

Dörflegeichter 2000

D' Pipilotti tuet als erschti go,
Si macht halt lieber Video,
Ou d' Jaqueline Fendt, isch gli am End,
Hett Ihri Zit e chlei verpennt,
Ou dr Burkhalter als Financier,
Im Milliarde-Loch, chasch dä nümme gseh
Ou dr Stöckli und d' Zölch tüe Zit verliere,
Und im comité Stra-Tragique umeliire
Monsieur Couchepin dit: „ ça me fait chier,
Je veux die EXPO nümme gseh !“
Mir Geischer finge das nid zum lache,
Das Chasperli-Theater, wo die tüe mache !

Üsi Nidougass isch Busfrei worde
Ändlech, ändlech, schreie ganzi Horde,
Als Fuessgänger hesch du trotzdem kei Rueh,
Darfsch jo nid spile blindi Chueh,
Jetzt muesch ufasse wie-n-e Jäger uf der Pirsch ,
Dass nid vom ne Skater überfahre wirsch !

Dr Ogi Dölf isch gar nid froh,
Olympia wird nid nach Sion cho,
Keine Freude herrscht, nume Chatzejammer,
Mir wüsse worum, das isch der Hammer,
Die meischte Delegierte, das heit dir vergässe,
Wei statt Raclette lieber Spaghetti frässe !

Der Lothar, dä Sturm vom Stefanstag,
Dä zeigt üs allne klipp und klar
Wie verletzlech nir si, hei mir jetze gseh,
Es gheie Bäum u Mäschtli vo'r BKW
Vielleicht isch's e wink vo däme do obe,
Dass si d' Freileitig z' Biel nid hei gleit i Bode !

Dä nöii Loeb isch e rundi Sach,
Do isch alles rund bis ungers Dach,
Es git e Huffe schöni Sache,
Uf em Dach tuet e Bär das Gschäft bewache,
Chasch mit em Lift ufedräie i aller Rueh,
Und wenn ändlech dobe bisch, isch dr Lade zue !

Chunnt er oder chunnt er nid,
Chunnt er oder chunnt er würklech nid,
Das hoffet ds Liseli im Bett näbem Maa,
U cha sich fasch nümme ruhig ha,
Nid wäg däme wo dir meinest, das wär üs z' bunt,
Sondern ob der Stöckli scho wieder im Tele Bi(e)lingue chunnt.

Millenium-Uhr, Millenium-Wurscht,
Millenium-Bier hilft gäge Durscht,
Millenium-Schämpis, dä git der Schiisser,
Millenium-Ching trotz Millenium-Pariser,
Das Millenium isch i allne Gringe,
Und üs schisst's a, do drüber es Värslu z'bringe !

Em Gmeindrat Scherrer sy Partei
Verlüt bi de Whle nid nume e chlei,
Derfür blibt är jetz chli meh dehei,
U hett meh Zyt für d' Bieler Polizei
Und är wird sich sicher nid lo lumpe
No meh i de Fettnäppli umezgumpe !